

## ■ CONVIVENZA

# Sche la vita fiss sco swisscom tv 2.0

DA VIOLA PFEIFFER\*

Sche la vita fiss sco swisscom tv 2.0 fiss la vita bler pli bella. In mument romantic, l'emprim bitsch, la party dal 18avel anniversari, l'emprim surrir da l'uffant, las vacanzas a Madeira, la festa da finiziun dal master – tut quai pudess ins arcunar en il grond magasin cun ina capaciad da 2400 uras. Uschia pudess ins adina puspè laschar reviver quests muments – perquai ch'ins pudess simplamain anc ina giada laschar ir quai sin la pitschna boxa da tv.

Sche la vita fiss sco swisscom tv 2.0 fiss la vita bler pli interessanta. Durant in'emissiun stentusa, lungurusa u penibla pudess ins simplamain midar il chanal. Durant ina lecziun da pedagogia lungurusa pudess ins per exempel tschentar enturn sin il nov film da «Fack ju Göhte».

Sche la vita fiss sco swisscom tv 2.0 fiss la vita bler pli simpla. Durant ina clausura pudess ins smatgar pausa e spert ir a guardar suenter ils results. Ed era per scolasts che vegnan bumbardads cun dumondas fissi pli simpel. Nagin scolast na stuess pli duvvar la stgisa: «Quai decler jau lura en la proxima lecziun.» E sch'ins stuess durant in zuppabainbain exnum ir sin tualetta pudess ins simplamain fermar il mument, ir sin tualetta, puspè smatgar sin cuntinuar ed il partenari na vegniss mai a savair tge ch'è capità tranteren.

Sche la vita fiss sco swisscom tv 2.0 fiss la vita bler pli excitanta. Ins pudess arcunar tut e lura



sursigliar las pausas da reclama, las parts stanclentusas, las fasas d'emprender u era la damaun suenter il 18avel natalizi. Ins pudess sursigliar la «Tageschau» e gist cumenzar cun il film. E sch'i vegniss «Musikantenstadl» pudess ins simplamain tschentar enturn sin ina transmissiun dal Gurtenfestival.

Sche la vita fiss sco swisscom tv 2.0 fiss la vita bler pli empernaivla. Sch'ils trens al Stadelhofen tgulan puspè ina giada uschè dad aut ch'ins sto tegnair las ureglias pudess ins simplamain tschentar pli da bass il tun. E tar las amias che scutinan en il tren secrets privatischems pudess ins far pli dad aut e sa divertir vi dal baterlim e tschantscherlim.

Sche la vita fiss sco swisscom tv 2.0 fiss la vita bler pli clera. Tut fiss en ultra HD. Ils chavels resch cotschens dad Ed Sheeran fissan anc bler pli cotschens, ils eglis blaus da Jared Leto anc bler pli blaus. E sch'il lover actual na fiss ina giada betg gist uschè scharf pudess ins simplamain tschentar enturn sin in chanal en HD. E per cas ch'il temp modern vegniss ad ins ina giada memia grisch e monoton pudess ins tscherner in drama istoric

e far bogn en latg cun Cleopatra, batter en la Guerra trojana cun Achilles e racoltar ils fegls d'arbaja giu dal cranz da Cesar.

Sche la vita fiss sco swisscom tv 2.0 fiss la vita era bler pli patgifica. L'abitaziun fiss per exempel adina pulida perquai ch'ins pudess adina puspè ir al stadi schuber cun smatgar sin il buttun «returnar». Durant ina tura en ils culms pudess ins simplamain far ir enavant il film fin ch'ins è sin il piz. Ins pudess sursigliar tut las lavurs da seminari, tut las clausuras e fadias e bregias e gist obtegnair il master, il doctorat, na gist la professura – per dir ch'ins smatga schon sin il buttun da far ir enavant.

Sche la vita fiss sco swisscom tv 2.0 midass jau crai jau tar la cablecom.

\* Viola Pfeiffer studegia germanistica, istorgia e rumantsch a l'Universitad da Turig. Mintgatant lavura ella per la «Südostschweiz», mintgatant per il «Teletext» e mintgatant sco scolasta, ma bunamain adina scriva ella.

## Vocabulari

bitsch – Kuss  
 arcunar – (ab)speichern  
 stentus – anstrengend  
 lungurus – langweilig  
 tschentar enturn – umschalten, wechseln  
 smatgar – drücken  
 stgisa – Ausrede  
 zuppabainbain – Techtelmechtel  
 excitant – spannend  
 sursigliar – überspringen  
 stanclentus – ermüdend  
 transmissiun – hier: Fernsehübertragung  
 tgular – pfeifen  
 pli da bass – leiser  
 scutinar – flüstern  
 baterlim e tschantscherlim – Klatsch und Tratsch  
 fegl d'arbaja – Lorbeerblatt

Unterstützt von der  
 Lia Rumantscha



Lia Rumantscha